



O LE SULU SAMOA

EKALESIA FAAPOTOPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IUNI 2023

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

AUE! TALOFA E, UA MALILIU TOA!



Susuga Ailepata Leuta FT



Faletua o le Toeaina, Atigisami Lesa



Pasi fou a le Matagaluega Aana, pasia e le Fono Tele

FAASINO UPU

1. O LE LAUGA	2
2. PEPA FONOTELE 2023	3
3. O LAU AFIOGA O LE SULU	7
4. O LE PEROFETA MULIMULI	8
5. O E UA MALILIU	13
6. ATA O MATAUPU LOMIA	16

O LE LAUGA

Tusi Faitau: Ioane 1: 16-18.

Matua: Ioane 1:18.

Manatu Autu: *O ai Iesu? (Who is Jesus?)*

O le fesili lea o nei ona po ma le lolofi mai o le mau talitonuga, ua tauau ina saoloto ai le tagata, ma avanoa ai e faailoa Iesu e fua i lona lava talitonuga, aemaise ina ia faafetaui lona faauigaina o Iesu e fua i lona mana’o. O le mafuaaga lea o lo‘u taofí e tatau ona o tatou saili le tali, e tusa ma le molimau, a i latou o e sa latou feoa’i faatasi ma Iesu. A e tainane o le sao o le au fai evagelia, o e na matuā vaai tino ma faalogo i a’oa’oga a Iesu.

O loo tatala lava le molimau a Ioane ia Iesu, i lona fai mai. “*Sa i le amataga, le Upu, sa i le Atua le Upu, o le Atua foi le Upu. O ia lava sa i le Atua i le amataga. Na ia faia mea uma lava, e leai foi se mea e tasi na faia e lei faia e ia...Sa i le lalolagi o ia, na ia faia foi le lalolagi; a e le i iloa lava ia e le lalolagi.*” O loo au’ili’ili e Ioane i lana molimau, le tulaga tutusa o le Atua ma Iesu, ina ua faamanino mai o Iesu o le “UPU”. O le fa’aaogaina o upu Eleni e lua o loo maioio ai le natura o le Atua feagai ma lana foafoaga... O le upu Endaithedos....O loo faamatalaina ai le upu na sau mai le fofoga o le Atua, o le upu lea na foafoa ai e le Atua le lalolagi. A o le upu Prothorikos...O le upu lea sa taofí e le Atua i

lona finagalo sa tausia ai (preserve) le lalolagi. Le upu la lea o loo molimau i ai Ioane. O le upu sa i le fatafata o le Tama, lea ua liutino tagata o loo faamatala i le fuaiupu e 18. “*E le i vaaia lava le Atua e se tasi; o le Alo e toatasi o loo i le fatafata o le Tama, o ia ua na faailoa mai o ia.*” O le fatu lea o le molimau a Ioane ia Iesu. O ia o le Alo e toatasi o le Tama, ua afio mai i le lalolagi, o ia foi lea ua ia faailoa mai le Atua i le lalolagi. O AI IESU? O le tali...O le Alo e toatasi sa i le fatafata o le Tama, ua ia faailoa mai le Atua ia i tatou.

I le molimau a Ioane ia Iesu o loo faamanino mai e Ioane o Iesu.

1. O Iesu o le Mesia.
2. O Iesu o le Alo o le Atua.

1. O Iesu o le Mesia.

O loo manino i le molimau a Ioane, le tulaga Mesia o Iesu, e pine lana molimau i le tulaga Mesia o Iesu, i vavega e 7 na faia e Iesu. O le galuega faamalolo ma vavega na faia e Iesu, o loo sipela manino ai lona tulaga Mesia, auā na o le Mesia na te faia vavega ma faamalolo i ma’i. E pei o le Liliuina o le vai e avea ma uaina (Ioane 1: 1-12), o le faamaloloina o le atalii o le ta’ita’i o le toaselau (Ioane 4: 46-54), o le faamaloloina o le ma’i i le taelega (Ioane 5: 1-11), o le Fafagaina o le 5,000 (Ioane 6:1-15), o le savali i luga o le vai (Ioane 6:16-21), o le faapupulaina o le tauaso (Ioane 9:1-12) ma le toe faatuina o Lasalo (Ioane 11). Na molimau foi i ai Ioane le Papatiso o ia lava o le teuteu ala o le Mesia, i lona papatisoga na afio ifo ai le Agaga o le Atua e peiseai o se lupe, i ona luga. Fai mai foi Aneterea ia Simona lona uso.

“*Ua o matou maua le Mesia, ua o matou vaai foi i lona mamalu*”(Ioane 1:41) O ai Iesu? Ioe, O Iesu o Ia lava o le Mesia.

2. O Iesu o le Alo o le Atua.

O loo manino le molimau a Ioane ia Iesu o ia lava o le Atua sa i le amataga, na ia faia mea uma lava. Auā na fesili Mose i le Atua ina ua iloa le laau talatala ua mu a e le’i faaumati le laau. O ai ea lou suafa ou te ta’u i tagata ina ia o latou talitonu ai? Fetalai le Atua ia Mose, *A fesili ane tagata ia te oe po o ai a’u, ia e fai atu i ai.* “*O A’U O LE OLA O LOO OLA LAVA*” (Esoto 3:1-21)

O loo molimau Ioane i saunoaga “O A’U” e 7 a Iesu o loo manino ai lona tulaga Atua. E pei “O A’u le areto o le Ola” (Ioane 6:35), “ O A’u le

malamalama o le lalolagi (8:12), “O A`u le Faitotoa (10:7), O A`u Leoleo mamoe lelei (10:11,14), “O A`u le toe tu ma le ola (11:25), “O A`u le ala ma le upu moni ma le ola(14:6), male “O A`u le vine moni (15:1) O saunoaga o a`u ia e 7 a Iesu, o loo manino ai o Ia lava le Atua sa i le amataga na la faia mea uma lava, e leai foi se mea na faia e lei faia e ia...O ai Iesu? O Iesu o Ia lava o le Alo e toatasi o le Atua. Fai mai Ioane O ia lava le Alo e toatasi sa i le fatafata o le Tama, o ia ua na faailoa mai o ia. “*Aua ua faapea lava ona alofa mai o le Atua i le lalolagi, ua ia aumai ai lona alo pele e toatasi, ina ia le fano le tagata e faatuatua, a ia maua le ola e faavavau*” Ioe o Iesu o le Alo o le Atua.

O lo tatou faatuatua lena le Ekalesia e, o Iesu lava lea ua na ia faailoa mai le Tama ia i tatou, o le Iesu lava foi lea o loo o tatou talitonu ma faatuatua i ai. A o le auina mai o Iesu ma lona liutino tagata, o le fa'aaliga lea o le Alofa Tunoa o le Atua i lana fanau, ma ua manino ai foi lo tatou faitauina faatasi i le malo e faavavau pe a tatou talia ma talitonu ma le mautinoa lo tatou Alii. O le na ia tapena mo i tatou le ola e faavavau ma saunia le avanoa mo tagata uma e ala i lona soifua na ofoina mai atoatoa ina ia le fano le tagata faatuatua a ia maua le ola e faavavau.... Manuia ona o Iesu...Amene.

**Saunia: Namaia Kofe Tuiletufuga FS,
EFKS Vaotupua Falealupo,
Matagaluega ITU O TANE.**

PASI FOU MO MATAGALUEGA

O le Fono Tele 2022 na pasia ai le faatauina o ni Pasi fou e ta'i tasi mo Matagaluega Faasaleleaga (Kolisi Tuasivi) ma Aana. Ua uma ona faatino ma faatau le pasi mo le Kolisi Tuasivi, a o lenei ua faataunu le faatauina o le pasi a Aana. O nei Matagaluega e ta'i 2 a latou pasi e pei ona sa ulua'i pasia ai e le Fono Tele i ni tausaga ua mavae. O le tau o le pasi e tasi e tusa ma le \$150,000+ ma e faatupeina atoa e le Ekalesia Aoao, e tusa ma Tala Faatatau o Tupe saunia e le Komiti Tupe ma le Ofisa o Tupe a le Ekalesia i lalo o le taitaiga a le afioga Teutupe, susuga Melepone Isara FS. O le fela'uaiga o fanau a'oga a le Ekalesia, le autu o nei mea totino.

PEPA FONO TELE 2023

**Manatu Autū: O ATU IA E
FAAMALOLO MA FAASA'OLOTO**
O' U TAGATA. Mataio 10:8

Faatomuaga:

I le suafa manumalo o Iesu Keriso, le Ao o le Ekalesia, e muamua lava ona ou faatalofa ma faafeiloai atu i le paia maualuga o le Fonotele 2023. Susū lau susuga i le Taitaifono faapea le Laulau a le Fonotele, susū susuga i toeaina, le mamalu i le aufaigaluega ma sui usufono uma o lenei tausaga, faapea foi le tapuaiga a le Ekalesia Aoao.

O le a fa'aaogaina pea le manatu autū o le Fono Tele ma le Tusi faitau (e pei ona ta'ua i luga) e fai ma autū o le su'esu'ega. O lenei su'esu'ega o se toe va'ava'ai i le gagana a Mataio (rhetoric in language), faapea ata faa-faatusa (imageries) e toe faamanatu mai ai ni foliga o le galuega faamalolo, auā le savaliga a le ekalesia ma le au kerisiano i nei vaitau o le mau faafitauli ma lu' itau.

O ni fesili e fai ma ta'iala: (1) O le a le uiga o le galuega faamalolo e tusa ma le molimau a Mataio? (2) E faapefea ona faatino le galuega faamalolo i nei aso o le faatupulaia pea o lu'itau ma faafitauli o le soifua? E 6 vaega ua vaevaeina ai lenei Pepa:

1. Mataio ma le Uluai Ekalesia

O loo ua talia lautele e le au su'esu'e, (i) o Mataio le soo o Iesu (Mata.9:9-13, 10:3) o ia lava le tusitala o le evagelia. (ii) O lenei Tusi sa tusia mo le lotu i totonu o Anetioka i Suria i le vaitau o le 50 – 70 TA. E lei faigofie le tau amataina o le lotu kerisiano ona o pulega faakolone a le malo Roma. Aemaise o le vaitau tonu lea o le mata'utia o le ola sauāina o le au kerisiano, a o avea le tagata o Niro ma Ameperoa o le malo. O loo iloga lava Niro i le talafaa solopito o le ekalesia kerisiano, i lona tu'ua'iina o le au kerisiano i se afi na sasao ma mu ai le taulaga o le malo Roma i le tausaga 64 TA. E foliga mai ua fa'aaogaina e Niro lenei faalavelave e faataunu ai lona naunauta'i ina ia taotaomia le tupu o le lotu, auā e toatele lava kerisiano na fasiotia ai (persecutions). Fai mai le isi

mau, o Niro lava na susunuina le taulaga ona o le naunau e sui foliga o le aai; o lona mana’o a o lea ua amo e le au kerisiano mafatiaga (scapegoat) ina ua tu’ua’iina fua. A o foliga ia o le ekalesia o loo tusi i ai Mataio: (i) o loo taotaomia, sauāina i faiga faakolone, (ii) ua tu’ua’iina fua ma e lama lava le otī i taimi uma.

2. Mataio 10:8a – O le Galuega Faamalolo.

O le mataupu lenei e 10 o loo aofia i le vaega o loo talanoa ai Mataio i le tapenaina ma le auina atu e Iesu o le au sooo mo le galuega faasoo (The Disciples’ Ministry – Mata.9:35-11:1). E taua se ata o loo aumai e Mataio i fuaiupu 1-2, o loo amata i le valaauiina o le *au sooo* (μαθητάς - *mathetas: disciples, pupils*), ona tuuina lea i ai e le Alii o le *pule* (έχοντιαν - *exousian: sent on a mission*). O le gasologa (process) lea o le avea ma sooo o le Alii. E valaau, e a’oa’o, e faau’uina i le pule, ona o loa lea e fai le galuega.

O le a fa’aaogā pea le fuaitau autu e faavae ai le talanoaina o le mataupu:

Ia outou faamalolo (*therapeuete*) i e mama’i (*asthenountas*), faatutū (*egeirete*) i e ua otī, faamamā (*katharizete*) lepela, tutuli (*ekballete*) i temoni... (Mata.10:8a).

O le upu galue (verb) o le *therapeuo* o loo fa’aaogaina e Mataio mo le upu *faamalolo*. O le a amata se manatu i le upu *faamalolo* mai le Feagaiga Tuai ona o le malosi o mafaufauga faa-Feagaiga Tuai i le Tusi.

I le Feagaiga Tuai, o le upu o le *rapha* o loo faamatalaina ai le upu *faamalolo* i ona uiga eseese: (i) O le faa-atoaina o se mea ua lē atoa (to restore, repair) po o le faafoisia o le malosi i sē ua lē malosi (make healthful) (Failauga 3:3; Nume.12:13; Sala.6:2; Iere.17:14; Teute.32:39; 2 Tupu 20:5-8; Sala. 41:4; Iere.30:7). O loo fa’aaogaina foi e faamatala ai le faamagaloina o agasala (forgiveness of sins) (Iere.3:22). O lona uiga, o le upu *faamalolo* i le Feagaiga Tuai, o le galuega ina ia toe faa-atoatoa se vaivaiga i le tagata i ona itu eseese, i le tino, mafaufau ma le agaga.

I le Feagaiga Fou, e 3 upu o loo fa’aaogaina mo le *faamalolo*; ma e atagia i upu uma ia le tāua o le galuega faamalolo i le tagata atoa –i le tino, mafaufau ma le agaga: (i) O le *sōzō* (to save) – e ui e lilifa lava le fa’aaogaina o le upu lenei i le faamalolo faaleagaga, a e o loo aofia i lenei upu le faamaloloina o le tagata atoa (Mata.9:22; Mare.5:24; 10:52; Luka 7:50).

(ii) O le *iaomai* (to heal)- e tele ina faamatalaina ai faamalologa e faia i le mana o le Alii (divine healing power) (Mata.8:8, 13, 15; 15:28; Mare.5:29; Ioa.12:40). (iii) O le *therapeuo* o loo autu i ai le su’esu’ega, e mafai ona faauiga o le “to heal, treat, cure, to care for the sick, to serve”, e aofia ai galuega o le fofō, o le tausi, ma le auauna atu.

O se faauigaina (working definition) e mo lenei pepa; o le *faamalolo*, o le galuega e auauna atu (serve), ina ia faa-atoatoa (restore, repair) mea ua lē o atoatoa.

O loo manino lea manatu i le fuaitau autu, “*ia outou faamalolo i e mama’i*”, ia auauna e faa-atoatoa i e vaivai (*astheneo – the weak*) ma lē atoatoa le malosi i le tino, mafaufau ma le agaga. O veape foi o loo mulimuli mai, o loo faalautele atili ai le uiga o le galuega auauna. O le “*faatutū*” (*egeirete - to raise up*), e fesootai ma le faaeaina o sē o loo ola taotaomia, tusi’esea. E fesootai foi i le faatula’i o sē o faataotolia i se ma’i (Mare.9:27; Galu.3:7), o le faamamā (*katharizete – to cleanse*), o le faamamāina o ma’i o le tino, faapea foi le agasala a le tagata (Levi.13:13, 17, 23, 28; Galu.10:15, 11:9; 2 Kori.7:1), o le tutuli (*ekballete – to throw out*), o le galuega faamalolo e moomia ai le tulia o le temoni ina ia faasaoloto le tagata o loo ua saisaitia ai (Mata.7:22, 8:16, 9:33).

O i, ua matua fesootai lelei ai le galuega faamalolo ma le faasaoloto e pei ona faamamafa i le manatu autu o le Fonotele. Sa fa’aaogaina lava e le Alii le ata faafoma’i e faamatalaina ai le uiga o le galuega na afio mai ai, “*e lē aogā le fomai i ē malolo, na o e mama’i.*” Mata.9:12, na afio mai mo lē o loo ma’i, o loo moomia le fesoasoani.

A tatou toe foi i le lalolagi o uluai kerisiano, e le itiiti lava le taua o le ‘u’unai e Mataio o le galuega faamalolo po o le auaunaga a le ekalesia mo kerisiano o loo sauaina, i ona itu uma.

3. Foliga o le Galuega Faamalolo.

E leai lava se isi faataitaiga sili mo le galuega faamalolo na i lo Iesu o Lē ana le galuega. E 3 lava ni ata e fia faataua mai le tala o Mataio:

(i). O Iesu le Foma'i (Healer)

O le faamaloloina e Iesu o e mama'i, na faasaolotoina ai foi i latou uma mai mafatiaga o le tino, mafaufau faapea foi le agaga (Mata.4:23-25; 9:35; 14:34-36; 15:29-31; 21:14). E fai ma faataitaiga, o le faamaloloina o le lepela, e le gata ina malolo le tino, a ua malolo foi ma le mafaufau auā ua mafai ona toe ofi atu i totonu o le li'o o tagata o le nuu, malolo ai ma lona agaga i le mautinoa ma le faatuatua i le Atua faaola (Mata.8:1-4; Mare.1:40-45; Luka 17:11-19).

(ii). O Iesu le Faia'oga (Teacher).

Mo Mataio, e le gata na fetalai Iesu o la o le faia'oga (Mata.10:24-25; 23:10), a e sa faapea foi ona tautatala ai nisi (Mata.8:19; 19:16; 22:16, 24, 36; 26:18). O le galuega atoa a le Alii sa vaia ai le lē mapu o le a'oa'o atu e uiga i le Atua ma Lona Malo. O le galuega e faaosofia i lona alofa mutimutivale (love, compassion) i le tagata vaivai; ua la faatusaina e pei o mamoe ua leai se leoleo mamoe ma o loo mo'omia le ta'ita'iga ma se faasinoga (Mata.9:36-38). E le'i faailogaina foi se nofoaga po o se taimi sa faia ai Lana galuega, sa a'oa'o atu i totonu o faato'aga ma nuu o Kalilaia (Mata.9:35; 11:1), luga o le ala i Ierusalem (Mata.20:17-19), luga o le Mauga o Olive (Mata.24:3-25:46), totonu o le malumalu (Mata.21:33), totonu o sunako (Mata.4:23; 13:54), totonu o fale (Mata. 13:36-52), luga o vaa (Mata. 13: 1-3), i aso uma e oo lava foi i le Sapati (Mata. 26:55). Ua taufafiofo foi tagata uma i ana a'oa'oga (Mata. 7:28; 13:54; 22:33) auā e a'oa'o atu o le tagata ua i ai le pule (Mata. 7:28-29). E taualuga le ata faafaia'oga i Lona tuuina atu o le pule lenei, e o atu ai ona so'o ma a'oa'o atu i nuu uma, ma ia fai i latou ma so'o (Mata. 28:19-20).

(iii). O Iesu le Perofeta/Failauga (Prophet/Preacher)

E ui ina latalata le so'otaga ma le ata o le Faia'oga, a e taua lava le ata lenei ona e mamafa le vaai i le

galuega faaperofeta a le Alii – o le faailoa lea o le Upu a le Atua (Word of God) mo le tagata. Lea la e iloa i le lapataiga ina ia salamō (repent) auā ua latalata mai le Malo o le Lagi (Mata.4:17) faapea le Toe Afio Mai o Keriso (Second Coming), ma le gataaga o mea leaga uma (Mata. 24 & 25).

O loo manino i nei ata le uiga o le galuega faamalolo a le Alii. E lē gata o le faamoemoe o le auina atu o soo ia faia le galuega (to serve), a o le auaunaga ina ia fa'aatoa mea o loo mo'omia ona fa'aatoa (restore). O le auaunaga e fesoasoani i soo se tasi o mafatia i le tino, mafaufau ma le agaga. Ia lē faailogaina foi se nofoaga ma se taimi e faia ai le auaunaga, auā o le auaunaga e faaosofia ona o le alofa mutimutivale. O le isi itu tāua, e lē na o upu sa a'oa'o atu ai le Alii i tagata, a e na o faatasi ma Lana faatinoga.

4. Mataio 10:8e – O se Fili o le Galuega Faamalolo.

O le vaega lona lua o le fuaitau autu, o loo atagia ai se apoapoaiga tāua ina ia mafai e le au soo ona alofia nisi o fili e ono faalavelaveina ai le galuega faamalolo.
"ua maua fua (dōrean) e outou, ia outou foafuaina atu (dōrean)"

O le uiga o le upu *dōrean* (adverb) o loo faamatalaina ai upu galue o le "maua" ma le "foa'i", o le meaalofa (gift), leai se totogi (without payment). O lona uiga o loo apoapoa'i le Alii i le au soo, na outou maua faameaalofa e aunoa ma se totogi le faamalogia a le Alii, ia outou foai atu foi faameaalofa, ia aunoa ma se totogi. O le lapataiga e laugatasia ai le au fai evagelia i le finagalo o le Alii (Mata. 10:8e-9; Mare. 6:8; Luka 9:3) – ina ia 'aua le avea le tamaoaiga ma faalavelave i le faatinoina o le galuega. O se ata manino e fa'aogaina e le au fai evagelia e faatusaina ai fili o le galuega o luko feai (Mata.10:16-23; Luka 10:3-4) – e tele ina faataatau i e tete'e ma agaleagaina le aufaigaluega. Peitai i apoapoaiga a le Alii, o le tamaoaiga foi ma le mana'o i le 'oa, o le isi lea luko e sili ona fe'ai ma e faigofie ona afaina ai le au faigaluega. O le ala faamalosi lea o le Alii i Lana lauga i luga o le mauga ina ia faataua e le auauna le 'oa i le lagi, a e lē o 'oa i le lalolagi nei. E iloa foi i le 'oa e avei i ai le faamamafa – o le lagi po o le lalolagi – le mea o i ai le loto o le auauna (Mata.6:19-21).

E taua ai foi le manatu, ina ia faamalolo muamua le au soo, ona o atu ai lea e fai le galuega. O loo lapata'i le Alii i fuaiupu 5 & 6 ina ia alofia le galuega ma tagata ese, a e tau o fale o Isaraelu. O le fesili: Ua faaitu'au ea le Alii ma ana fetalaiga? E leai! Auā a fua i le upu na faatonuina ai ona soo i le i'uga o le Tusi, o loo aofia ai le tagata ese (Mata.28:19). O le ata o loo aumai e Mataio, e tatau ona faamalolo muamua Isaraelu, ona mafai lea ona o atu e fai le galuega faamalolo i isi tagata (Mata. 7:1-5).

5. O le a se faatatau mo nei aso?

Muamua, i nei aso i le faatupulaia pea o faafitauli eseese o loo ua faavaatu'ia ai le malaga a le au kerisiano i lenei lalolagi, o se taimi o loo sili ona moomia ai galuega faamalolo a le ekalesia e faasaoloto ona tagata mafatia ma saisaitia. Tatou te fetaia'i pea ma le tagata e mo'omia se fesoasoani i soo se ala, ua faamanatu mai Mataio e pei foi ona malosi i le ulua'i ekalesia i na ona po, ia tautuana o tatou faiva faa-soo, e o atu e auauna, fesoasoani, i soo se taimi ma soo se nofoaga.

Lua, ua maitauina le si'isi'i pea o le tau o le soifuaga ma ua a'afia ai le tamao'aiga o le tagata, o le aiga, nuu, malo ma ekalesia. O mana'o o le tagata sa mafai ona faatupe i aso ua alu, ua faigata lava ona toe faamalie i aso nei. O le itu e sili ona faigata pe a oo ina lē mafai e le tagata ona fetu'unai le mana'o e fuafua i le tamao'aiga ua ia maua. O lea lava ua vaaia i nei aso lenei faafitauli, o le malosi o le mana'o i le 'oa, ua mafua ai le lē faamaoni o le faatinoga o le auaunaga. O le valaauna faa-soo, ia muamua pea le finagalo o le Atua, e fesoasoani ai i lē o loo saisaitia i le malosi o le 'oa.

6. Manatu Faai'u

Muamua, o le galuega faamalolo a le Alii i le vaai a Mataio, o le faia o le auaunaga mo e o loo moomia le fesoasoani, e faafoisia ai le malosi i le tino, mafaufau ma le agaga. O le galuega e avea ai le au soo ma foma'i, faia'oga, perofeta ma isi, ina ia tau lau o le faamoemoe o le galuega faaola.

Lua, o le alofa mutimutivale (compassion) o le Alii, o le alofa e tupu ona o loo vaai i le tagata o loo fia maua se fesoasoani. O le alofa lea a tatou maua,

ona lē faalavelaveina lava lea o le galuega faa-soo i le mau faafitauli ma lu'itau o le ola. E taua le 'oa ona o meaalofa na aumai e le Atua mo le tagata, a e a faamuamua loa, ona fai loa lea ma fili o le galuega. O la Iesu, "*E leai se tasi e mafai ona auauna i alii se toalua... Tou te lē mafai ona auauna atu i le Atua atoa ma le oa.*" (Mata.6:24).

Tolu, ua uma foi ona tu'uina mai e le Alii le pule e faatino ai e le au so'o le galuega, o le galuega e faalagolago i le ta'ita'iga a Lona Agaga, o le malosi lena e mafaia ai.

Ua faamalo le folau i le ekalesia a le Atua, faafetai i le galuega faamalolo o loo fitaituga lava i ai, e le gata o faiva o le ekalesia i lona aoao tetele, a e faapea foi i auaunaga taitasi, mai lava i le paia o le aufagaluega seia oo i ona tagata lotu uma. O outou faiva faa-soo o loo ala atu ai pea faamanuiaga a le Atua mo Samoa ma le lalolagi. A e taua pea le toe faatupu manatu o le autu o le Fonotele i lenei tausaga, se'i toe asiasi ai le soo ia ia te ia lava, po o a mai le galuega ua valaauna ai e Keriso?

"O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia; ia outou a'oa'o atu ia te i latou ia tausi i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi." Mata.28:19-20.

Ia faamanuia tele le Atua i le Fonotele a le Ekalesia i lenei tausaga 2023.

**Saunia: Susuga Dr. Malutafa Faalili FS
Faifeau Faia'oga Kolisi Faafaifeau Malua**

Mo le silafia, o le susuga i le Faifeau Faia'oga Faipapa o le Fono Tele 2023, susuga Dr. Malutafa Faalili FS, na te umia faailoga o le PhD, (Foma'i), Univesite o Newcastle, Ausetalia, 2019; MTh Distinction (Master), Pacific Theological College Fiji 2009; BTh, Malua Theological College 2007. O loo galue o ia i le vaega o le Feagaiga Tuai. O le susuga Dr. Malutafa o se lupe faalele a le EFKS Tafua, Faasaleleaga, ma lona faletua ia Josephine, o se taulaga soifua a le EFKS Apia; e to'a lua o la'ua alo, o le tamaitai o Maina ma le alii o MJ. **FS.**

O LAU AFIOGA LE SULU...

FAAUŌUŌGA VAVALALATA a e le o GALUEGA (Intimacy vs Activity)

“⁴²a o le mea lava e tasi e ao ina ia maua; ua filifilia foi e Maria lea mea lelei, e le aveeseina ia te ia.” Luka 10.

Ina ua asiiasi atu Iesu i le aiga o Maria ma Maretā, na matua’i iloga le eseese o a la’ua tali atu ia te ia. O le faamamafa a Maretā na tuu i luga o le taumafataga, ma lana tapenaga. O lona naunauta’iga ia faafafia Iesu. Peita’i o le vai vaiga taatele ea; o lana **galuega** sa sili atu ona tāua ia te ia, nai lo lona **Alīi**. Na amata mai o se auauanaga mo isi, ua avea nei o se auauanaga mo ia lava. Na galo ia te ia o le taumafataga ia viia ma faamamaluina ai Iesu, a e le o ia. Fai mai lana faagaulēmalie, “⁴⁰Le Alīi e, e te le manatu mai ea, ina ua tuu mai e lo’u uso ia te a’u e sauni toatasi? Ia e fetalai ane ia te ia, ia fesoasoani mai ia te a’u.” A o le a le tala a Iesu ia te ia? “⁴¹Maretā e, Maretā e, ua e popole, ma ua pupū lou loto i mea e tele; ⁴²a o le mea lava e tasi e ao ina ia maua; ua filifilia foi e Maria lea mea lelei, e le aveeseina ia te ia.”

A o le a le mea na filifilia e Maria? O le mafutaga vavalalata ma Iesu! O le fa’aaogā le taimi atoa e fesaga’i ai ma Iesu, faalogo i ana a’oa’oga, fausia le fesoota’iga ma le faiā pa’ia ma Iesu. O le mata’utia o taualumaga faalelotu, ona o le tele o taimi ua avea ai ma avanoa tatou te faia ai le tele o mea (pe afai e lē o mea uma), e faamalie ai o tatou lava naunauta’iga ia lelei, ma ia manaia le ata o lo tatou olaga i le vaai mai o isi tagata. I le isi itu, e faapea foi ona tupu i tagata e alolofa i le Alīi, tagata e filifili e faamuamua le mafutaga lilo vavalalata ma ia, a e lē fiafia e auai i galuega faatino ma mea fai a le lotu. Tatou te maofa i le toatele o tagata popoto ma atamamai, tagata malolosi ma faamanuiaina, latou te i’u ina vaivai ma solomuli, ona ua latou faatauagavale i lo latou faiā ma fesootaiga vavalalata ma Iesu. Latou te le’i faamoemoe foi pe mana’o i ai mai le amataga; sa manatu lava e latou te gafatia i lo latou lava poto ma le iloa, ma e le’i faamalosia i latou e faalagolago ia te ia. A lē o lena foi, sa latou vaai i le soifuaga faalelotu ma le Atua, i se tulaga faapisinisi – o le Atua ma le lotu ua na ose tasi o polokalame faatasi i le vaiaso i le Aso Sa ma mea e fai ai.

O le filifilia e Iesu o le mea na fai e Maria – le fefaasooa’i vavalalata i se mafutaga paia ma ia – e a’oa’o mai ai se mea tāua mo i tatou: se’i vaganā ua fa’aogetotonu i o tatou olaga le sootaga vavalalata ma le Atua, o le a tatou tauivi pea e saili le uiga moni o le ola, e selesele ma le fiafia fua o a tatou galuega, ma maua atoa le filemu ma le olioli loloto o le Atua.

O LOO VALAAU LE ATUA IA TE OE

(1) “*O Paulo, o le auaua a Iesu Keriso, na valaauna e fai ma aposetolo, ua tofia e tala’i le tala lelei a le Atua.*” Roma 1.

Na tagofia e le Atua se vaega o le tala’aga o le soifuaga o Paulo na gaosia a e le’i avea o ia ma Kerisiano, ma na maua ai e le Atua ni mea aogā sa i ai. Ma o le tele o ia mea e lē ni mea faaleagaga. O nisi o nei mea o tulaga tau i lona a’oa’oina i le poto salalau ma lona atamai i lana aganuu. E ui ina sa le’i agavaa Paulo ona o lona inainā e fasioti le au Kerisiano, a o le talaaga tulaga ese o lona olaga sa mafai ona agavaa ai o ia, i le fua a le Atua. O lona avea ma faresao, na ia malamalamā lelei ai i le Tusi Paia a Iutaia – le Penetatiuka, Tala Faasolopito, Salamo & Tusitusiga o le Poto, Perofeta – faapea mafaufauga o ta’ita’i Iutaia o le a latou fetaia’i ma tete’ e mai. Ma o lona tauaso faaleagaga sa i ai muamua, na ‘u’una’i ai o ia i se naunauta’iga uiga ese i le fia maua mai o mea na ia leiloa. Na fa’aaogā e le Atua o mea lelei faatasi ma mea leaga o le soifuaga o Paulo, mo le misiona o Lana Ekalesia. Ma e faapea foi ona mafai e le Atua ona fai ia te oe! Se’i toe manatunatu ane i ai: ina ua saili e le Atua se tasi e avea ma ulua’i Toeaina i Lana Ekalesia, se tasi na te mafai ona tusia le mataupu silisili o Lana Ekalesia, se tasi e mafai ona finau ma puipui le a’oa’oga a Lana Ekalesia, e faalautele a’oa’oga a Keriso i totonu o potu a’oga ma nofoaga o agafesoota’i, na te mafai ona tala’i atu le Tala Lelei o le faaolataga i soo se tagata - mai le tagata aupito maulalo i magāala, se’ia oo i le nofoali’i o Kaisara – na maua e le Atua le tagata ua uma ona i ai nei agavaa, ma o le tagata lena e igoa ia Paulo. E peisea’i e faapenei ona galue le Atua: Muamua na te saili mai ia te oe ma su’esu’ e ia te oe, ona ia tapena lea ma saunia oe, ona ia tuu lea o oe i le nofoaga e talafeagai ma oe, ona ia faa-aunupegaina lea o oe ina ia e faia le mea, na te silafia, e aupito sili ona e lelei ma aogā i ai... **(fa’aaauu itulau 12)**

O LE PEROFETA MULIMULI

(*O le tala faasolo ua faaSamoaina mai le tusi, The Last Oracle, tusia e James Rollins*)

6.33 taeao.

Uosigitone.

O se tu'itu'i mai le faitoto'a na faate'ia ai Penita. Na lata ina faagale moe o ia a o nofo i lona nofoa, o ona tulilima i luga o lana la'au komepiuta fe'avea'i, ma le faaputuga o lipoti ma i'uga o su'esu'ega mai ia Lisa ma Malekoma i lalo ifo o ona foliga. O tuana'i atu na ia faatonuina ai Kati e fai sana moe i se tasi o moega o le potu su'esu'e. Ua alu le po atoa o ala o ia, ma e sa tatau foi ona ia faia lea fautuaga.

Na ia oomi le ki o le loka i lalo o lana kesi, ma matala ai le faitoto'a o le potu. Na ia faatalia Lisa po o Malekoma. Na nofo sa'o a'e i luga Penita i lona te'i ma faavasega ona vae.

O se tamaloa umi, tau'au lautetele na ulufale mai sa la'e i se sutu lanu moana. O lona lauulu lanu mūmū sa tele ina liu pa'epa'e 'efu'efu, na selu momoe i tua.

"Seana?" O Seana Makenaiti o le faatonu o le DARPA ma o le pule o Penita. O ia foi lea na ia tofia Penita i le Sikima ua silia ma le sefulu tausaga talu ai, ina o nofoia e Seana le nofoa o Penita. O Makenaiti o le uluai faatonu vaai mamao o le Sikima, na ia aveina mafaufauga o Atipale Poleki ma liliu e avea ma mea moni. A o le mea e aupito sili ona taua, o Seana o se uo mamae.

Na tālo atu le lima o le tamaloa ia Penita e nofo ifo i lona nofoa.

"Aua e te alu ese ma e tu mai mo a'u, lo'u atalii," na ia fai atu ai ia Penita. "Ou te lē o manatu e toe nofo i le nofoa lena."

Na ataata Penita. I le aso muamua o lona tofi faatonu, na lafo ai e Seana se pusa o fualaau mo le manava tiga. Sa ia manatu o se meaalofa lelei – a e o ni tausaga mulimuli ane, na tagofia ai e Penita le afa o le pusa.

"E i ai se mea o loo ia ta'u mai, Seana, o lau galuega e lē faasolo ina māmā."

"O aso nei ua leai." Na goto ifo Seana i se nofoa i tala ane o le laulau. "Na ou siakia le tulaga i le tamaloa lea sa iloa e Ta'ita'i Piesa i fafo o le fale mataaga. Mapeletope. Ioane Mapeletope."

"O lona uiga e lē sesē le ID na ia vaiaia?"

"E leai. O Mapeletope o se faauluuluga o le DIA. O lana vaavaaiga o le Malo o Rusia ma ona setete laiti." Na toe manatumatu Penita i le ulua'i faai'uga a Malekoma faasino i le mea na fa'ailoa atoatoa ai

Poleki i kasa oona vevela. Kerenopili. O le a le vaega a Mapeletope i nei mea uma?

"O le tamaloa e fai lava sina malolosi o ona sootaga i vaega faafitafita ma sootaga o le puipuiga o le saogalemu," na fa'aauau ai Seana. "E lauiloa i le mata'utia o lona sauā, ma le poto leaga e fa'aaogā ma pulea tagata. A e o ia foi o se tagata e lauiloa i le mautinoa ona ia maua mai i'uga e manaomia. O se oloa taua tele i Uosigitone."

"O le a la lona aafiaga i nei mea uma?"

"Ua ou faitau i lau lipoti e faailoa ai e oo mai le taimi nei. Ua e silafia tulaga uma faasino i le Poloketi Setaketi ua faailoa. Pe na faapefea ona taofia i le ogatotonu o le 1990s."

"A e le'i taofia," na fai atu ai Penita. "I ona tausaga faai'u, na mōu ese atu ai i totonu o le Lala Sooupou o Atamai mo le Puipuiga."

"E sa'o oe. Na avea ma poloketi a Mapeletope. Na faafesoota'i i le 1996 e ni saienitisi Rusia se to'a lua – o ē na faatamo'ea le faaliliuga a le Sovieti Iuni o le Sitāketi. Na taofia lona faatupeina ona saili mai lea mo sa tatou fesoasoani. Sa tatou malilie i ai – ona o le manaomia o ni a tatou faamanuiaga i lenei augatupulaga fou o fili e leai ni tuaoi. Ona tofia ai lea o se vaega itiiti o le au Iasoni e galulue faatasī ma le au Rusia. O iina na matua'i faavasegaina ai ia lilo le poloketi atoa. Mou ese. Na o ni nai tagata to'a itiiti sa latou iloa sa i ai se mea faapea."

"Se'ia oo ina au sulusulu mai Atipale i fasitepu o tatou faitoto'a," na fai atu ai Penita.

"Tatou te talitonu na sau o ia e faailoa atoatoa mai i latou. Ina ia aumai faamaoniga e pine faamau ai."

"Faiga sauā matautia sa fai i le igoa o saienisi."

"I le igoa o le saogalemu o le malo," na faasa'o atu ai e Seana. "Ia manatua lelei le mea lena. O le suau'u lena na te faamase'ese'e ia uili i Uosigitone. Aua ne'i manatu māmā ia Mapeletope. E iloa lelei e le tamaloa ta'alo i le taaloga lenei. Ma e talitonu o ia o se tagata loto nuu moni. Ma ua oo lava ina ia faamautū lona igoa ma lona sao i totonu o vaega eseese o vaega'au ma lālā mo le puipuiga o le saogalemu. I iinei ma fafo atu i le lalolagi salalau."

Na lūlū le ulu o Penita.

Sa fa'aauau pea Seana, "Ua fesoota'i Mapeletope i vaega'au uma o le malo e saili le ulupoo na e aumaia. Soo se ituaiga vaega. CIA, FBI, NSA, NRO, ONI... Ou te talitonu ua uma foi ona ia faafaigaluegaina le vaega o sipai ua ritaea i le AARP."

Na taumafai Seana e ‘ata i lana tala mālie, a e na sau i fafo ma le lē lava. “E lē mafai ona ou saga taofia le ufiufi e tapuni ai lenei mea. Na fana Atipale i luma tonu o tatou faitoto’ a. O lona fesootaiga i le au Iasoni, i le Sikima, e lē mafai ona saga lilo pea. Ma i le mae’ a ai o le silasila a le malo i a tatou su’ esu’ ega i le tausaga talu ai, ua tula’ i mai ai le tele o magaala e taunuu ma i’ u mai iinei.”

“O le a la le mea o loo e saunoa mai ai?” na fesili atu ai Penita.

“Ou te manatu ua oo i le taimi e toe faailoa a’ e ai i luga le ulupoo. O loo taamilo solo luko ma ua faasolo ina lata mai. E mafai ona ou tuuina atu le ulupoo e ala i se isi lālā o le vaega’ au a le malo, ina ia lē maua ai se asaasa o le auala e tau mai i le Sikima.” Na fetau i lana pupula ma fesaga’ i ai ma Penita.

“A o le a e maua ai na o se afa aso, se periota e faatasi ai ma le teine. Afai e lē maua ni tali e Karai ma le vaega i le taimi lena, e ono faamalosia i tatou e tuu atu o ia.”

“Ou te lē faia le mea lena, Seana.”

“Atonu o le a leai se mea tele e te mafaia.”

Na tu i luga Penita. “Ia e tatau la ona oulua feiloi muamua ma le teine. Vaai i ai, po o le a le mea na fai i ai. Ona e ta’ u mai lea pe faapeflea ona ou tuuina lena teineitiit ia Mapeletope.”

Na vaaia e Penita lona faiaoga ua tau feto’ i. Sa faigofie ona fetu’ u le lē foligā. U i lea, sa luelue le ulu o Seana ma tu a’ e i luga. Sa le’ i i ai se taimi na matamuli ai o ia i le faafitauli. O le ala lena o le fa’ aaloalo tele o Penita i le tamaloa.

“Ta o i ai e faafeiloa’ i,” na fai atu ai Seana.

Na la’ ua ulufafo faatasi ma o ifo i lalo i fogafale e lua i le mea sa taofia ai le teineitiit.

A o la’ ua taunu i le fogafale i lalo, na iloa atu e Penita ia Kati ma Lisa i le faasi’ usi’ uga o le potu i autafa o le faitotoa o le potu o i ai le teine. O Kati sa foliga mai o loo vevesi. Na iloa e Penita sa lē fiafia le tamaitai ina ua uma ona vaai i le ata na tusi e le teineitiit o lona toalua o Monike, peita’ i sa i’ u ina to’ amalie ifo i lalo lona ita. Na ia ta’ utino foi lona tatala o lana ato ma fa’ aali i le teine ata o lana ia tama teine, o Penelope, a o pepe o ia, ma le faamoemoe e fausia ai se sootaga vavalalata ma le teineitiit. Sa i ai se ata o Monike i ana ata. Peitai ou te mautinoa e le’ i vaai i ai, na fai mai ai Kati. O lo’ u lea mautinoa i ai. Na o le pau le isi faamatalaga, e ui ina mamaao ma sala ese, e faapea na se’ i ese mai e le teine foliga vaaia o Monike mai le ulu o Kati, o se tasi e latalata i le fatu o le fafine.

Po o le a lava le auala, o Kati sa to’ afilemu ma sa malie o le a sili loa ona fai sana malologa puupuu. O lona lē lava tele na oso ai lona ma’ ema’ eā.

Ina ua vaai atu nei i tamaloloa, na alu ifo i lalo Kati i le potu e faafeiloai i la’ ua, ua manino lava lona fiafia e faatali.

“Lau afioga i le Faatonu,” na ia fai atu ai faatopetope, “o lea sa tuu e valaau atu. Ua toe oso maualuga foi le fiva o le teine. E tatau ona vave fai se fuafuaga. O le manatu o Lisa... e manatu o le teine o le a otí.”

2.35 afiafi. Akara, Initia.

Na faanatinati atu Karai i luga o le auala. O lona latalata atu i le magāala autu o i luma atu, o le faateteleina foi lena o le pisi o le auala. O tagata savavali na fe’ ōma’ i e tau fai pipi’ i tau’ au, a o faasolo lemu atu i le va o taavale o tau tolotolo. Ua tapuni atoa e le savali ma faafiafiaga le auala. O taavale ua liliu ese i isi auala ‘alo.

Ua tau fai fe’ ei pu o taavale, o logo o uila, o le fe’ ei o tagata ma le palalaувale.

O latou tua ane, na fe’ ei mai ai pasika sa tau faaofiofi mai ma faaūū tetele o latou afi. E oo lava i le au fanafana ua auai i le vevesi faasoloatoa o tagata. Ui i lea, sa faamautinoa e Karai ia lilo pea o ia.

Na sōsō atu i ona autafa Koualasaki, a o ia punou ifo i lalo o se manu papalagi na aveina se taavale solofanua. “O nisi o i latou la ua i lalo ua savavali.” Na tepa ane i tua Karai. Ua faasolo ina mamaao ese atu i tua pasika e tolu. O pasese na ti’ eti’ e mai ai ua tuua pasika ma mulimuli atu i le solo a tagata. E to’ a lula na o i le autafa o le auala, a o le toatasí na alu i le ogatotonu.

O taufaamata’ u e tolu ua avea nei e ono.

“Ou te lē fiafia i na tulaga lē fetau,” na tomumu ai Karai. Na ia faataatia vave se fuafuaga ma fai atu ia Koualasaki i le mea e fai ma le nofoaga latou te toe feiloi a’ ai. “O le a ou ui i le auala i luga. Alu oe i le auala i lalo.”

Na tolotolo atu le tamaloa lapo’ a i luma o se loli. Na ia pupula atu i se faaputuga o otaota mai solofanua, o asini ma kamela o savavali. “E faapeflea ona tuu a’ u e ui i le auala i lalo?”

“Leaga o a’ u lea e ofu pa’ epa’ e.”

Na punou atili ma tolotolo maulalo Koualasaki, e tasi le lima i luga o le asuemu. Na toe alu tolotolo i le fale talimalo.

A o taofi e Karai le pulou Panama i luga o lona ulu, na ia osotū atu i le keli o se tasi taavale la’ u pasese i luma atu ma alu atu ma le atoa agai i le faafiafiaga.

Na patapatatū atu ona seevae i luga o le taavale la'u pasese ma lona keli – ona ia oso atu lea i luga o le isi taavale i luma atu, ma faasolo atu ai lava i luga o taavale laiti, taavale la'u pasese ma taavale la'u uta. Na mulimuli atu ia te ia le tauvalaau ita ma le faalālā o moto a tagata. Peitai i le ituaiga poloka lea o le auala, o le ala i luga le auala e sili ona vave taunuui ai. Na ia tepa atu i luga o lona tau'au. E pei ona sa ia manatu ai, na i'u ina iloa atu o ia e le au fanafana. Ina ia 'aua le toe leiloa atu o ia, sa faapea foi ona savalia e le toatolu le auala i luga o taavale. Na latou o ane mai itu e tolu, a o le mea e sili sa le'i paleni la latou savali e fana atu ai se pulufana.

A o ia punou maulalo, na fā'aogā e Karai le tootoo o Matesone e faapalenai ai lana oso musamusa pei se lane aga'i i le vāvāō ma le vevesi o le faafiafiaga i luga o le auala. Na ia taumafai e tata'i ese le toatolu o savavali mai a latou pasika.

Vaevae ma faatoilalo.

A o ia sese'e atu i luga o se tasi veni, na vaai atu ma iloilo e Karai le sami o tagata i ona tua. Pau o lea, o le sami ua i ai nei se malie fou i totonu. Sa le'i iloa atu e Karai ia Kouasaki, a e na ia molimauina le aao sosolo o le tamaloa. I tua mamao atu, na faavāvā mai ai le pasika autū i autafa o se loli. Ina ua taunuui ane le pasika i luma, na faafuase'i lava ona osotū i luga le ave pasika, ma lona tino sa gatete. Na faalogoina e Karai le pa-pa-pa mai o le leo, e pei o mea faapāpā o le faafiafiaga.

Na tofu faatasi i totonu o le sami loulouā o tagata le pasika ma le ave pasika. Na lafi pea Kouasaki. A o taula'i le vaai a le tagata fanafana i le sola a Karai, sa faigofie i le tamaloa laulauā ona faapa'ū teisi i tua, taoto e faatali, ona sunu'i lea o lana fana M4 na gaoia mai, i le avepasika a o ia pasi ane. Sa fana tutu'i, tuulafoa'i.

Peitai e le'i uma le faiva a le malie i le sami lea.

Na tuu ai pea e Karai le tamaloa lapo'a e fai lana galuega faamaligi toto a e fa'aauau atu agai i le vevesi ma le malomaloā o faafiafiaga. Na pepese, sisiva, taliē ma fe'ei. Na salalau mai musika mai pu o taavale ma le tatagi o sumepalo. O le sauniga o Ianimasitami, e faailoga ai le fanau mai o Kurisina. Mai lana maitau atu, na ia iloa ai nisi o latou sisiva i le Rasa Lila, o se siva faaleatunuu Manipuri e faailoa ai uluai tausaga ulavale o Kurisina, ina o fai a latou amioga tautalaititi ma tamaita'i tatau susu. Na iloa atu foi nisi o faaputuga o alii talavou o faia se piramita i tagata, o taumafai e fetagofii atu i 'ulo 'ele omea sa tautau ifo i luga o le auala. O nei 'ulo, e ta'ua o tai-aniti, sa faatumulia i pata ma sisi. O le taaloga sa faatino ai le soifuaga faamaumau o Kurisina, a o latou fiafia ma ana uo e gaoi mai pata mai o latou tuaoi. Na lagona atu e Karai le fetalia'i faaleaganuu e lagolago ai.

"Kovinita! Kovinita!"

Ose tasi igoa mo Kurisina.

Na autamo'e atu Karai i luga o taavale aga'i i faafiafiaga. O le auala i luma atu na poloka atoa ma o taavale na liliu ese i isi auala, o le ala lea na faai'u ai le auala i luga a Karai i le auala o fai ai le pati. Na ia oso ese mai le keli o le taavale la'u pasese mulimuli ma oso atu i totonu o le motu o tagata.

A o ia palasi atu i le mea sa i ai le anoano o tagata, na ia aveese le pulou pa'epa'e ma lona peleue, na aveese ai ana teuga na lafi ai a e numi faatasi ai ma tagata. Na taofii le tootoo i le tasi lima, a o lana tama'i fana na oomi atu i lona ogavae a o ia tulei atu i le va o tagata. Na ia faasaga fuafua atu i le pito o le faafiafiaga sa i ai faleoloa ma taavale la'u taumafa sa tumu ai ma tagata lagolago sa laina i autafa o le auala.

O le fuafuaga la te toe feiloai ma Kouasaki i le tulimanu i matu sisifo o le aai faatafafā. Sa le'i tofotofe e fa'aauau le feiloaiga i le olo seja mautino ua leai i latou sa tulitulia i latou. Na taunuui Karai i se fale sa i ai le fai toto'a e ulufafo ai pe a mu. Na i ai se apefa'i uamea na toso ma sa tautau ifo ai, ma sa faatumulia vaega o le fale i tagata sa auai i faafiafiaga i lalo. Na a'e atu Karai i le fogafale lua mo se nofoaga lelei e maitauina ai tagata aemaise e iloa atu ai Kouasaki.

Ina ua taunuui atu i le fogafale, na iloa atu e Karai se tasi o i latou na tulia o ia, a o ia oso mai le pusa o se loli i tagata faafiafiaga. O isi ana paaga ua leva ona i ai i le fefiloi, na iloa gofie i o latou pulou uliuli. Na punou ifo le tasi ma sii a'e i luga se pulou pa'epa'e ua eleeleia i le suauu. Na ia tia'i ese i lona ita ma le fememea'i. Sa faamoemoe Karai o le a latou iloa le leai o se faamoemoe o le tulaga o loo latou i ai ma ia solomuli ai. Peitai sa le'i faigofie lava.

Na osotū atu Kouasaki i totonu o le motu o tagata. O lona suti peleue sa matua'i maanuminumi. O ona lima na gaogao, o ona alafau na fetotoi. A o lona tulaga sa sili ona leaga o lona maualuga. O le maualuga o le tamaloa e i luga a'e lona ulu ma ona tau'au nai lo le toatele o tagata. Na ia vaai ma maitau atu le motu o tagata a o sii a'e ona lima e faamalumalu ai ona mata mai le sesega, a e ia tulei atu i totonu o le vasa o tagata.

Pau le mea, e lē o Kouasaki le malie o i totonu nei o le sami.

O se tasi o tamaloloa na fai pulou na ia tusi atu faasino i le itu o i ai le tamaloa laulauā, na te iloa atu o ia. Sa latou faalatalata atu ma si'omia o ia mai itu uma.

E lē lelei. Na faliu Karai, peita'i sa faasolo ina toatele i le faapaologa, ma le apefa'i sa faatumulia i tagata. E le mafai ona ia taunuui atu i le ogatotonu o tagata i le taimi talafeagai.

Na toe liliu i tua Karai, ma a'e i luga o puipui o le faapaologa, ona oso ese atu ai lea – oso sa'o i luga. I luga atu, sa tautau ifo ai se ueaea mafafia e suā'uua, mai le faapaologa i luga atu ma faasolo atu i le sikuea. Na falō atu e Karai ona lima i luga ma faalave le 'au o le tootoo i le ueaea. O le suigi o ona vae ma le uuna'i o lona tino na ia sosolo faalue atu ai i le ueaea, na lolo'u ifo i lalo i le ogatotonu e se tasi o ulo omea lapo'a. Na ia u'u mai le tootoo ma suigi le isi ona lima faasasa'o i lalo.

A o sese'e atu ona vae i luga o le ulu o se tasi o le au fanafana sa fai pulou, na ia fana atu ai i le va o ona vae. Na lavea tonu le tamaloa ma pa'ū ifo i le eleele, na nuti lili'i lona pulou pei se atigi popo mago.

Ona a'e lea o Karai tau atu i le tumutumu o le piramita o tagata sa fe'a'ei atu i luga mo le ulo omea. Na ia tau atu i le tamaloa sa aupito i luga ma tulei ifo i lalo, a e tu ai i lona tulaga. A o ia taumafai e pipii mau ia 'aua ne'i pa'ū, na faafuase'i ona pa'u ese ifo le tootoo i lalo autafa o le piramita – faatasi ai ma lana tama'i fana.

Na tau fai pulato'a atu tagata ia Karai.

Faatasi ai ma le to'a lua na totoe o tagata fanafana. A o aunoa ai ma lana auupega, na faapaleni Karai i luga o le tamaloa na i ona lalo ifo ma uuna'i a'e ai o ia i luga. Na ia tago atu 'u'u le ulo omea, tatala ese le mea na loka ai, faatasi ma sana tatalo lē leoa ia Kerisina, na ia togi ifo ai i lalo i le tagata fanafana aupito latalata atu.

Na talia lana tatalo.

Na taia tonu le ulo omea i foliga o le tagata fanafana a o tepe a'e i luga, ma salalau solo ai pata ma kulimi o le susu. Na ia patatū faō i lalo.

O le tagata fanafana lona tolu na ia si'i a'e lona lima, ma autago solo lana fana. A o fe'e le motu o tagata, na ia tafana atu pulu e lua ia Karai – a e ua leai Karai mai le mea sa i ai. Na toulu ifo le piramita o tagata ma faaputu i ona lalo ifo. Na lagona le felelei atu o pulufana i luga o lona ulu a o pa'ū ifo o ia.

Na ia tulauelolele ifo i le lavelave solo o vae.

Na tauivi solo Karai i le taumafaiga e tu sa'o. Na savali atu le tagata fanafana i le faaputuga o le motu o tagata, ma lana fana o loo faalālā. A e na te le'i faapā atu lana fana, na emo mai se malama pa'epa'e i luma atu. Na autafiti i tua le ulu o le fanafana, na taia ai le 'au o le tootoo nifo elefane o Matesone. Sa maua e Koualasaki le tootoo ina o pa'ū ifo, ma sasau atu le ta e pei o se tama taalo pesipolo.

Na pisi a'e le toto mai le ulu o le fanafana, ma palasi ifo i lalo ma le pasasa o lona papatua.

Na se'i a'e e Koualasaki le fana a le tamaloa ma faalālā atu le tootoo i va lavelave o vae ma tagata. O Karai na tago atu 'u'u mai le 'au o le tootoo, a o Koualasaki na toso faasaoloto mai o ia.

"Oti i le pata," na fai mai ai le tamaloa laulaū. "Manaia tele, Piesa. Maua le isi uiga fou o le vaai lelei o le ga'o i le toto."

Sa vevesi solo le vaega lea o le auala. Na tau fai laga solo tagata i soo se itu. O leoleo ofu toniga na taumafai e su'e avanoa i le va o tagata tamomo'e solo. O Karai ma Koualasaki, o le taimi lea o loo faapupuna maulalo, na faatafefa atu ai i le solo vevesi o tagata agai i auala tuaoi.

Mulimuli ane i le mae'a ai o nai minute faavesivesi, na iloa atu ai le maualuga o le 'olo lanu mūmū i o la'ua luma atu, i luma o auvai o le Vaitafe o Iamuna. Na la'ua sopoia atu agai i le pa puipui anamua – Olo o Akapa – o se nofoaga o mataaga mo tagata tafafao i le aai, e lona lua i le Tai Mahala.

Na laina ai le anoano o taavale la'u pasese, o veni ma taavale limosini i ona luma.

"Piesa!" na valaau mai ai se tasi ia te ia.

Na talo mai le lima o Sei Rosauro ia te ia mai tafatafa o se tasi o limosini, o se tafolā pa'epa'e umī. Na ia savali atu ia Rosauro. O Luka sa tu i le faitoto'a matala. Ua uma ona nofoia i totonu Elisapeta ma Matesone.

"E lē matua'i iloagofie," o Karai lea, a o ia maitauina le taavale.

"E tatau ona tatou ofi uma ai," na talatala atu ai Rosauro, ona ataata lea. "Ia ma lea, o ai na fai mai e sa ona si'i le tasi i le isi?"

"O loo silafia lelei e le tamaitai le mea la e fai mai ai," na fai ane ai Koualasaki ma savali agai i luma. "Atonu o le a latou tuu mai ia te a'u e avea le taavale." "Leai!" na tau fai feosofi mai ai Karai ma Rosauro. Na toe foi ane Koualasaki ma foliga faalii, ma faapa'ū i nofoia i tua o le limo. Na sosoo atu ai Rosauro.

A e le'i faatasi atu i ai Karai, na ia vaavaai atu i le auala ma alasavali. E le'i i ai nisi na amana'ia i latou. Atonu ua pe le si'usi'u. Na ia mimilo ese ma faatau pupula atu i le pi'oga o le vaitafe.

I se vaaiga mamao atu, na pupula manaia mai ai le sinasina o le mapu o le maota tele i le susulu o le la, i le filemu ma le to'afimalie, a o taatia mai autafa o le vaitafe. Na u atu le tua o Karai i le Tai Mahala. Na o tagata oti e momoe filemu. A o ia ulu atu i tua o le limosini, na faataiō mai Matesone ma le ita tele, "O le a lau mea na fai i lo'u tootoo?" Na faapalasi atu Karai i luga o le nofoa. O le 'au nifo elefane o le tootoo o le sefuluvalu senituri, sa lilofia uma i le toto. O teuga sa vanevane i le lolō'u o le 'au o le tootoo na matua'i lamolemole lelei mai le ti'eti'ega faalue sa fai i luga o le ueaea ma'ama'ai.

(E sosoo atu i le Sulu Samoa Iulai 2023)

O LAU AFIOGA O LE SULU

Ma o le valaau a le Atua na o le pau lea o le mea na te aumaia ia te oe le fiafia atoatoa, e ui ina e te lē iloa muamua lea tulaga. O le mea lea, o e lagona o loo valaau le Atua ia te oe? O Ia saunia ma tapena oe? O la tuu oe i se nofoaga faapitoa e talafeagai ma ou agavaa? O Ia faa-auupegaina oe? E te maua le atoatoa o le fiafia ma le olioli i lou olaga, ina ua e si’ilima ma tali atu, Ioe, ia te la ma Lana valaau mai!

(2) “⁵na a’u faapaiaina oe a o le’i fanau mai oe”. Iere.1.

O le upu ‘faapa’iaina’ o lona uiga o le tu’u ese mo le fa’aaogaina faapitoa. O le upu ‘faau’uina’ o lona uiga o le faatonuina e tusa ma se fuafuaga ua faataatia. O mea nei e lua e ao ona silafia: e lē ma’imauina e le Atua se mea na la faia, ma e na te lē ma’imauina se mea na te mafai ona fa’aaogā. A e le’i faaolaina oe, na faataga e le Atua uluai laasaga uma o lou olaga, o mea na fausia ai oe, mo le faamoemoe sa i Lona finagalo. O nei mea e aofia ai ou matua na fanaua oe, o la’ua nuu ma afioaga, o a’oga sa a’oa’oina ai oe, o le aofa’i o tausaga sa e i ai i kolisi ma iunivesite, o galuega sa e galue ai, ma ituiga atina’e sa e auai ai. E faapea foi ma mea na tuuina e le Atua i totonu ia te oe i le taimi na e fanau mai ai, e ui ina o nisi o nei mea sa latou tete’e ia te oe a o e tuputupu a’e.

O e taofiofi pea i talitonuga e pei o se taifau i lona matai? E mafai ona fa’aaogā e le Atua mea na. E te fiafia e faitau i tusi ma su’esu’e atili i mafaufauga o nisi tagata? E fia fa’aaogā foi e le Atua uiga na. E vave ona e tula’i atu e faafetaia’i, ma fiafia e osofa’i se tagata po o se mea o fai mou fili? E fia fa’aaogā foi lou uiga lena e le Atua. O le taimi nei atonu e te faapea ifo e sesē le nofoaga lena e te i ai, e sesē mea o loo e faia, ma e sesē foi tagata o loo outou mafuta ma galulue faatasi. Pe atonu foi o loo e manatunatu pe faapefea ona e toe sola ese mai le faafitauli ua saisai a oe, pe mafai ona e toe sao a’e i luga mai le luga ua e pa’ū ifo i ai, e toe fai se suiga o lou olaga. O le upu moni, o le tali sa’o e te lē toe mafai.

Peita’i e mafai e le Atua! E faia e le Atua vavega mai mea sesē (He makes miracles out of mistakes!) O lea, ia tuu uma atu ia te Ia mea o lou olaga e lē lelei,

mea ua e ita ma inoino i ai, o mea ua latou ta’uvalea oe, ma fai atu, ‘Le Alii e, o mea ia. Ua ou ta’utino atu maimau e, pe ana ese so’u olaga mai lenei leaga, a e leai. Maimau e, pe ana mafai ona ou toe suia, a e leai lava.’ Ona taatia lea i le Atua na te galue, e faafou ma fa’aaogā lou soifua mo Lona finagalo, ma fai ai oe mo Lona viiga.

(3) “²²a ua ou faatoga mo oe, ina ne’i mavae lou faatuatua.” Luka 22.

E mana’o le Atua e te faia Lona finagalo, peita’i e te lē tātātā ona ausia le tulaga o le matua faaleagaga, o le saoloto lea mai ia Satani. E mafai ona e manumalo mai ia te ia, a e lē mafai ona e ‘alofia o ia. Vaai foi ia Peteru. E tasi le kia o lana taavale na alu ai: o le matuā saosaoa faatelevave. O le tele o taimi sa i le ogatotonu o ia i mea sa tutupu, peitai sa le’i tula’i mai o ia i le tumutumu o mea uma. O le tamaloa na i’u ane ua na ta’ita’i le Ekalesia, na muamua ona ia faafiti o ia se so’o o Iesu. E fai sina mata’utia. Peita’i e leai se mea faasino ia i tatou e faate’ia ai le Atua. Na te lē valaauna i tatou ma faapea ane, “Ou te faamoemoe o oe le tagata talafeagai.” E leai; na fetalai Iesu ia Peteru, “³¹Simona e, Simona e, faauta, ua mana’o tele Satani ia te outou, ia lūlū ia te outou pei o le saito; ³²a ua ou faatoga mo oe, ina ne’i mavae lou faatuatua... ”Luka 22.

Pe lē o se fa’aliga ofoofogia lena? E ui ina e te lē iloa ona tatalo mo oe lava, o loo tatalo ma faatoga Iesu mo oe... ²⁵o le mea foi lea e mafai ai ia te Ia ona faaola pea lava i e faalatalata atu i le Atua ona o Ia, auā o loo soifua pea Ia e fautua mo i latou.” Eperu 7.) Na fetalai Iesu ia Peteru, “³²a o oe foi, pe a liua mai oe, ona e faamalosi ai lea i ou uso.” Mai le lavelave o le gaogaosā o loo e i ai i le taimi nei, e mafai ona maua mai ai se tala’iga mo nisi. E lē gata ina mafai e le Atua ona toe liliu faataamilo lou olaga, a e mafai foi e la ona fa’aaogā oe e faaliliu ai olaga o nisi tagata. Ma le tasi lenei manatu: E lē manatu le Atua e talafeagai ona liua oe pe afaei e te solomua ona leai sau taumafaiga muamua e faasa’o se mea ua tatau ai. O lona uiga, mata o loo i ai se mea tāua e ao ona lavea’iina mai ai oe i le amataga. O le aso nei o loo valaauna mai ai le Atua ia te oe. ‘Aua le toe maumauina se taimi; a ia lafoa’i atu lou tagata atoa ia te Ia. **(F. Sulu)**

O ē UA MALILIU

ATIGISAMI FUIMAONO MIMIO
E. LESĀ
24/9/1962-20/4/2023 (60+7+27)

O le Faletua o le Faifeau Toeaina susuga Enefatu Lesa FT, le faafeagaiga taulagi a le EFKS Tanoalei'a, Vai vase-uta. Na soifua mai o ia le **Aso Gafua, 24 Setema 1962**, a e na valaaaina e lona Matai i le **Aso Tofi, 20 Aperila 2023**; ua atoa ai le 60 tausaga 7 masina ma le 27 aso o lona soifua. O ona matua o Fuimaono Tafafuna'i Su'a Mimio ma Lauvi Faafiuomalo Fuimaono. Na ma'ua faaipoipo i le **Aso Sa, 16 Mati 1986**. E to'a 7 le fanau, ma fanau fai; e to'a 8 fanau a fanau. Sa a'oa'oina i le A'oga Aso Sa ma le A'oga Faifeau a le EFKS Saanapu, o le Aoga Tulagalua Saanapu, o le Kolisi Leulumoega Fou ma le Kolisi o Samoa. Sa a'oa'oina i le Kolisi Faafaia'oga (TTC) ma avea ai ma faiaoga faau'u o le Malo Samoa. Na ma'ua ulufale i le Kolisi Faafaifeau Malua i le **1988- 1991**, ma le Kolisi Faafaifeau a le Pasefika i Fiti i tausaga **1992-1994**. Na matou osi feagaiga ma le EFKS Tanoalei'a i Vaivase-uta i le tausaga **1997** e oo mai i le asō.

O tala o lona soifua na molimau i ai le fanau, le usoga, o aiga, o ana uo ma e masani, ma le Aulotu i Tanoalei'a. Sa faia lona lotu faatasi ma la matou aulotu EFKS Tanoalei'a i le **Aso Sa 30 Aperila 2023**, sa ta'ita'iina e Lupe faalele a le EFKS Tanoalei'a. O se sauniga na faatumulia i uo ma e masani, o aiga ma le Pulega a le Vaimauga. O lona sauniga faaleaiga sa faia i le **Aso Gafua, 1 Me 2023** i le itula e 1.00pm i Tanoalei'a lava. Sa taitaiina foi e Lupe faalele a le Eklesia i Tanoalei'a, ma sa faapea foi ona faatumulia le malumalu i Tanoalei'a i aiga, uo ma e masani.

O lona toe sauniga sa faia lea i le **Aso Lulu, 3 Me 2023** i le 8.00 i le taeao. Sa ta'ita'i le Toeaina Faatonu o le Matagaluega Vaimauga, susuga Aila Patea FT. O susuga Ionatana Te'o FS sa ia molimoli maia le sa o le tina, o Uele Iese Uele FS sa fatauina le Tusi Paia, o Seilala Luamanuvae FS na saunia tatalo, a o le susuga Siaosi Salesulu FS na saunia le lauga faamafanafana. O Lemalu Rome Fuimaono sa fai ma sui o le fanau e molimau, o le afioga ia Fuimaono Seve Te'i sa molimau e fai ma sui o le usoga ma aiga o le tina, o le susuga i le Toeaina o

Matafala Lesa sa molimau e fai ma sui o lo matou aiga. Sa molimau foi le faletua o le Failautusi o le Pulega, Henrietta F. Tagataese e fai ma sui o le Mafutaga Tina o le Pulega Vaimauga Sisifo. O Siavata Gale sa fai ma sui o le Aulotu i Tanoalei'a e molimau i le mafutaga a le tina ma le Aulotu EFKS Tanoalei'a. O a'u sa ou molimau i le mafutaga ma le tina, e faamatalaina "O le alofa e ufiifi ai mea uma lava", o osiga feagaiga ma le Atua faatasi ma tagata, e faato'a tatala lava ina ua oo mai le ot. O ona toe sauniga i lona oliolisaga tumau sa faia i lona aiga i Saanapu-uta, na ta'ita'iina e le susuga Denny Epati FS, o le faafeagaiga taulagi a Saanapu. Na matou faatofa atu ai ia te ia i le pese faamavae a le au uso, "*Talofa uso e, tofaina oe..*" "*Ia faatasi pea Iesu ma oe, tau si ia te oe la 'u pele...*" Ia manuia lau malaga Mum, toe feiloai i lena taeao fou.

Saunia: Susuga Enefatu Lesā FT,
EFKS Tanoalei'a,
Matagaluega VAIMAUGA.

TAIULU FAUONO TALALELEI **TAPU** **(25/5/1954 – 20/5/2023 (68+11+26)**

O le faletua o le tiakono o le EFKS Tanoalei'a, Vaivase-uta. Na soifua mai Taiulu i le Aso Lua, 25 Me 1954, a e na valaaaina e lona Matai i le Aso Toonai, 20 Me 2023, ma ua atoa ai le 68 tausaga, 11 masina ma aso e 25 na soifua ai o ia. O ona matua o Lemana Puletiu Tiatia le tamā ma Eseta Esera Tiatia le tina. Sa faaipoipo atu ia Fauono Talalelei Tapu i le Aso Faraile 21 Oketopa 1977. E to'a lima le fanau, ma fanau a fanau e 14. Sa a'oa'oina i Vaimoso Primary School, Faleata Primary School ma le Kolisi o Samoa. Sa faigaluega i le Ofisa o Faamasinoga, faapea le Faletupe o Atina'e, ma le galuega sa galue mulimuli ai i le Bluebird Lumber & Hardware. O lana galuega lea, na faato'a nofo lava ina ua ia silafia o ia ua ma'i. O se tina toaga e faigaluega ma le vave ona usu i taeao. O lo la tofi Tiakono sa faaeeina i le aso 30 Mati 1987. Sa fai ma Teutupe ma Failautusi o le Mafutaga Tina EFKS Tanoalei'a. Sa avea ma usufono i le Fono Tele i le 2014. O ia sa faalagolago i ai le fanau ma le aiga i lona faafoeina, ma a'oa'o le

fanau ina ia ola to'aga ma le ola faamaoni i soo se mea. O se tina to'aga i le lotu ma a'oa'o foi i lona aiga i le taua o le lotu ma faamanuiaga e maua e le tagata faamoe i le Atua.

O lona sauniga faaleaiga sa faia lea i le fale maliu o Pa'u Sefo Pa'u i le Aso Faraile 26 Me 2023. Sa ta'ita'i le afioga i le Taitaifono Fono Tele, susuga Esera Auatama Esera FS, o le faafeagaiga taulagi a le EFKS Sapapalii. Sa molimau fanau ma aiga, usoga, uo ma e masani i le tina ma lona soifua fesootai atu i isi tagata. O ona toe sauniga sa faia lava i le Aso Toonai 27 Me 2023. O a'u sa ta'ita'i, o le susuga Charlie Banse FS sa molimoli maia le sa o le tina ma faiatau le Tusi Paia. O a'u sa saunia le tatalo, a o le susuga Julius Fruean FS, o le faafeagaiga EFKS Samatau na saunia le Upu faamafanafana. Sa molimau Seupule Tai e fai ma sui o le fanau, sa molimau foi le tamā ia Fauono Talalelei Tapu i le la'ua mafutaga ma le tina. O si ona uso le faletua o le Toeaina Penisione, afioga Tailua Tavita Roma sa molimau e fai ma sui o aiga i la latou mafutaga ma le tina. O a'u sa ta'ita'i i le sauniga i lona oliolisaga tumau, ma matou faatofa atu ai i le Pese faamavae a le au Kerisiano, *Talofa uso e, tofaina oe, ua sau le itupo e malolo, E ala oe pe a mavae le po, Tofa, tofa, tofa!* Ia manuia lau malaga Taiulu Tapu, tatou toe feiloai i lena taeao fou.

**Saunia: Susuga Enefatu Lesa FT
EFKS Tanoalei'a
Matagaluega VAIMAUGA.**

**TAUTUAMALO TOGIPŌ
TALAUEGA PAAPAA
(24/5/1936 – 10/6/2023) 87+0+18**

O le Tiakono o le EFKS Malaemalu, Pulega Falealili o le Matagaluega Falealili Safata ma Siumu. O le afioga i le tiakono ia Tautuamalo na soifua mai lava i le afioaga o Malaemalu, Falealili i le Aso Sa, 25 Me 1936. Na maliu o ia le Aso Toonai, 10 Iuni 2023. Ua 87 tausaga ma aso e 18 le matua o lona soifua. O ona matua o Talauega Paapaa ma tata'e Vaeila Iosua. Na faaipoipo atu Tautuamalo ia Faafua Foleni i le aso 22/8/1977, a e na faaofia faatasi i la'ua i le Ekalesia i le aso 27/5/1980, i taimi o le faifeau susuga Taulia ma Malama. A o le aso 1/6/1980 na faauuina ai i la'ua i le tofi Tiakono. O lona uiga ua silia ma le 40 tausaga o galulue i la'ua i le tofi Tiakono.

Sa fiafia tele Tautuamalo e tatalo, ma lauga i Lotu o le Vaeluaga ma Lotu Talosaga i le amataga o tausaga taitasi. Sa iloga lava foi lona tulai mai i le tofi Failautusi a lenei Aulotu, aemaise lava i taimi na fausia ai le Malumalu o lenei aulotu i Malaemalu i le tausaga 1998, a o galulue le susuga ia Mauga Motu FS ma Oneone. O se auauna e fiafia i sauniga lotu, o Tofiga ma Potopotoga faale-Pulega. Sa fai foi ma ana masani le tausi fono i le Fono Tele i Malua i tausaga e tele. I le tausaga 2012, e ui ina matua lona soifua i lea taimi (76 tausaga), a e sa loto tele lava e usufono Tiakono mo le Matagaluega Falealili i Sisifo i le Fono Tele o lena tausaga.

O se tiakono a o se tamā matua sa finau ma tauivi mo mea sili auā le feau ma le galuega a le Atua. Ma e faagalo gatā uiga tausaafia o lenei tamā. Aemaise lona loto maulalo, agamalū ma le filemū. E fiafia lava ma to'aga i sauniga lotu o le Aso Sa. Peitai ina ua faataotolia lava i ma'i o le tino, ona faigata lea ona auai mai i tapuaiga. O nisi o alo o le tiakono ia Tautuamalo ma Faafua o o loo galulue i le Feau ma le Galuega a le Atua. O Moli & Rev. Salani Karapani, Tusialei & Rev. Moe Tauti, Rev. Vaavaai & Leaiā Tautuamalo Talauega.

O lona sauniga lotu faaleaiga sa faia i le aso 19 Iuni 2023, sa faatinoina lava e taulaga soifua a le aiga. Sa ta'ita'i Rev. Vaavaai Tautuamalo, faiatau Tusi Paia Rev. Malo Tagatanuu, tatalo Rev. Oata Tuatagaloa, a o Rev. Moe Tauti sa saunia le Upu faamafanafana. O ona toe sauniga sa faia i le aso 20/6/2023, o a'u na ta'ita'i ma saunia le Upu faamafanafana. Sa faiatau Tusi Paia le susuga i le Epikopo o Tuivaiti Manatua, a o le susuga Toelei'u (Faifeau Metotisi) na saunia talosaga. Na molimau Faafua Foleni Tautuamalo, Aliitasi Talauega (lona tuafafine matua), Ululaau Tuitama (tuafafine), Rev. Sione Leota, ma Rev. Mauga Motu.

O lona toe sauniga i le tuugamau, o a'u foi na ta'ita'i ma matou faamavae atu i le pese a le au Kerisiano, *Talofa uso e, tofaina oe, Ua sau le itupo e malolo, E ala oe pe a mavae le po, Tofa, tofa, tofa!* Ia manuia tele lau malaga tamā.

**Saunia: Susuga Faaletau Faaea FS
EFKS Malaemalu
Matagaluega FALEALILI SAFATA SIUMU.**

LUAFALEALO LI’O TONY LENIU

(1/12/1961 - 19/3/2023 (61+3+19))

Na soifua mai le Afioga i le Tiakono i le Aso Faraile 1/12/1961 a e na faamanavaina e le Atua ana feau i le Aso Sa 19/03/2023 ina ua 61 tausaga, 3 masina ma le 19 aso o le soifua. O se faalavelave tau taavale i Sauano i Fagaloa, i le pasi na ia faafoeina na afaina ai le soifua ma taoto ai i le falema’i i Motootua ma malii ai lava. O ona toe sauniga sa faia lava i le malumalu o le ekalesia i Laulii, o le ekalesia sa soifua a’e ai ma tautua ai seja oo ina valaau mai le Atua. Ua loa foi lana tautua i le ekalesia e pei ona galue ai e ala i le matafale lotu ma lona tofi tiakono talu mai le tausaga e 2008. Tele lava molimau o lea aso, Vaasiva Pritchard, fai ma sui o le fanau, Toloa Topele fai ma sui o le aiga o lona tamā i Laulii, Susuga i le Aoao Fesoasoani ia Li‘o Foleni fai ma sui o le aiga o lona tina i Sapapalii, ma le Afioga i le Tiakono Toeaina, le faipule o le Va‘a o Fonoti Mau‘u Siaosi Puepuemai, e fai ma sui o le itumalo e faafetaia lana tautua matavela i le auaunaga sa ia faatino i lona itumalo e ala i femalagaiga i le falelua i Sauano ma Saletele.

Sa auga uma lava molimau i ona uiga o le agamalu ma le loto maulalo, o se tamā fiafia ma tausaafia, na te lē faatua’oiina tagata i lona alofa. Aemaise lava i le tautua i le atunu i le galuega o le ave pasi, ua sili atu i le fa sefulu tausaga o ia faatinoina, lea lava ua malii ai, ma ua silafia ai o ia e le tele o tagata. Na autu lava foi le molimau i lona soifua i le ekalesia i le fa’aaogaina lava ma le tatau o meaalofa ua foai mai e le Atua, ina ia viia ai pea lava lona Suafa. O le Susuga i le Toeaina Faatonu o le Pulega Vaimauga i Sasa’e na feagai ma Talosaga, a e o a’u lava na faia le Upu faamafanafana ma ta’ita’i i ona sauniga mulimuli i lona tuugamau. Amuia lea lava auauna, auā e valaau mai lona Matai, a e o loo faapea lava ona ia fai.

Manuia lau malaga Luafalealo. Tofa, tofa, tofa.

Saunia: Susuga Pita Toleafoa FS,
EFKS Laulii,
Matagaluega VAIMAUGA.

ETEREI TUAEFU KOME

ROEBECK

(5/2/1952 - 25/4/2023 (71+2+21))

Na soifua mai le tamaitai ia Eterei i le Aso Lua 5/2/1952, a e na faamanavaina e le Atua ana feau i le Aso Lua 25/4/2023 ina ua 71 tausaga, 2 masina ma le 21 aso o le soifua. O ona toe sauniga sa faia lava i lana ekalesia sa tautua ai, i le EFKS Laulii, i le aso 19/5/2023 ma o a’u lava na ta’ita’i, o le susuga i le Toeaina o le Faapotopotoga a le Atua ia Patolo Matalasi na faia le tatalo, ma o a’u foi na faia le Upu faamafanafana i lea aso. Tele lava molimau mananaia o lea aso i le soifua fa’aaogaina o le tama’ita’i nei sa tautua ai i lona aiga ma lana ekalesia aemaise o le aiga sa galuea ai e pei ona saunoa i ai le tamaitai ia Papali’i Carol Ah-Chong, ma o le aotelega lava o molimau o se tagata sa soifua i se soifuaga e faigofie, o lona uiga e le tele lava ni mea e naunau i ai, ae sa tamaoaiga i le alofa.


O se tagata e naunau i ona tiute fai i lana ekalesia, auā sa faia’oga A’oga Aso Sa, sa Autalavou, ma Aufaipese, ma ona tiute i le itupā o tamaitai i le Mafutaga a Tina i le ekalesia. Sa taua ia Eterei le taimi e pei ona fai mai le Poto, e i ai le taimi o mea uma, e ‘afa itula e le’i oo i se taimi o se a’oga pese, po o faia’oga A’oga Aso Sa, a e ua leva ona saofa’i Eterei e faatali tagata, ma o ona uiga lava ia o le a manatua pea lava. O a’u lava foi na ta’ita’i i ona toe sauniga i le tuugamau ma o matou faatofa atu ai i le pese faatofa a le au Kerisiano. *Talofa uso e, tofaina oe, Ua sau le itupo e malolo...*

Manuia lau Malaga Eterei.

Saunia: Susuga Pita Toleafoa FS,
EFKS Laulii,
Matagaluega VAIMAUGA.

Mo le silafia, o le Toeaina Faatonu o le Matagaluega AANA, susuga **AILEPATA LEUTA FT** (EFKS Satapuala), na malii i le Aso Tofi 11 Me 2023. O le Tina Penisione ia **DARU SAMUELU**, le faletua o le susuga toeaina o LIMUA’ASAMUELU, na malii i le Aso Toonai 24 Iuni 2023. O le a auina atu Tala o la’ua soifua tautua i le Alii e ala i le Ekalesia, ma o la’ua toe sauniga, i se lomiga o le Sulu Samoa o lumana’i. Tau ina ia faamaiseina e le Agaga o le Keriso Toetu manumalo, loto faanoanoa o aiga ma le Ekalesia pele ua tuua. **FS.**


TAUTUAMALO T.T. PA'APA'A




TAIULU FAUONO T. TAPU



LUAFALEALO LI'O TONY LENIU



ETEREI T. KOME ROEBECK



Le Laulau o le Fono Tele 2023, i le feiloaiga aloa'ia ma le Ofisa Tutotonu i Tamaligi.